



Uluk leh fir takin

Inner Line Permit enfiah dawn

Chanmari West:14th April: Central YMA chuan a wawi 7 nan Ram leh Hnam Humhalh Kumpulan a hman mek a, hemi kawnga hmalakna hrang hrang zingah Mizorama hnam dang awmte uluk leh fir taka endik a ni dawn tih a puang. Central YMA chuan Branch hrang hrangte a ruala mahni huam chhung theuh va Inner Line Permit (ILP) endik runpui neih a rel.

Central YMA-a Committee sang ber, Central Coordination Committee (CCC), Ni 10.4.2013 (Nilai) a Central YMA Hall-a thukhawm chuan Mizorama ILP lem hmanga hnam dang lo lut ru an tamzia an sawi ho a, Branch tinin a rualin mahni huam chhung theuha ILP endik runpui neih ni se, a hun tur erawh chu la inhriattir ni se tiin thutlukna an siam.

He committee-ah hian CWBYMA aiawhin Pu T Ngurkhuma, Central Executive Committee (CEC) leh Tv Zairemmawia, Branch Secretary-te an tel.

CCC thukhawm chuan Aizawl Municipal Council-in Licencing Regulation-a hman turah sundawngte chu Tribal Certificate nei ngei tura phut ngei nise an ti a, Aizawl khawpuiah hnam dangte,

dan lova an sundawn theih loh nan AMC hian Tribal Certificate neite chauh sundawn phalna hi pe se an ti bawk.

CCC thukhawm hi Central YMA President, Pu T. Sangkung'a n a kaihruai a, kumin YMA General Conference chu October ni 15 a tanga 17 inkarah neih ni se an ti a, a hmun tur chu nikkum General Conference-in a rel tawh angin Khawbung a ni dawn a ni.

CCC hian nikum General Conference-a thu pass bawhzui dan an thlir ho bawk. Ni 9.4.2013-a Zawlpuia In kang chungkaw 10 hnenah ₹ 2,000 theuh pek ni se an ti a, heng tanpuina sumte hi Lunglei Sub-Hqrs YMA hruaitute kutah an pe nghal a, anni'n Zawlpuia kangmei tuar chungte hnenah an hlan dawn a ni.

Central Anti-Drugs Squad (CADS)-in nasa takin hma an la

Central Anti Drugs Squad ruihhlo man, cheng vbc 1 chuang man chu Ni 10.4.2013 khan CM, Pu Lal Thanhawla'n Central YMA Office kawtah a hal ral.

Ruihhlo hal hma hian inkhawm tawite neih a ni a, hetah hian CM chuan, ram leh hnam humhalh chu YMA chauh ni lo, sorkar tih tur pawh a ni a ti.

CM chuan Mizoram chhunga awm, ram dang mite chu nek chep an ngai tih sawiin, nek chep tur erawh chuan taihmak a tul thu leh, thalaite pawh an than harh a tul thu a sawi.

Ruihhlo hal inkhawmah hian CM hian CADS tanpui nan ₹ 50,000 a pe a, Excise & Narcotics Minister, Pu JH Rothuama pawhin ₹ 1,00,000-pein ruihhlo do kawnga CADS hnathawh chu ropui a tih thu a sawi.

CADS man, ruihhlo hal ral tak hi tum 7 an halna a ni a, hengte hi nikum April ni 13 a tanga kumin April ni 9 thlenga an man, heroin hawng 20 leh a chanve, cane 586 leh piece 232, parvon spas leh proxyvon mum 1,39,476, nitrosun leh alprozelum mum 3,275, opium kg 2 leh pseudoephedrine kg 125 a ni a, vai hian Rs. 1,58,62,358 hu a ni.

Branch News

Ni 10.4.2013 (Nilai) nileng khan Central Co-ordination Committee (CCC) Meeting wawi 71-na Central YMA Hall-ah neih a nia, he hunah hian Vice President Pu T Ngurkhuma CEC leh Branch aiawhin Branch Secretary Tv Zairemmawia te an tel. Sub-Headquarters, Group leh Branch aiawh mi 192 ten ro an rel a ni.

Branch Executive Member Pu Zonunsanga (Patea) leh Pu TC Lalhmangaiha te dam sam lo chu an dam leh thuai an duh.

Chhiattawk an awmin Branch, Section hruaitute leh member-te tan la zual sauh sauh turin an in ngen. Tin, Chhiat tawk awmna section-te Branch bungrua uluk taka enkawl a, a dahna hmun tur dik taka dah leh thin turin an inchah.

Tunlaiin ruk ruk hriat tur awm leh tan ta a, chhungtinte fimkhur leh zual turin an in ngen.

Tun dinhmuna YMA Chanchinbu lak dan:

Chawngbawla	- 25
Vanapa	- 36
Neuva	- 36
Taitesena	- 46
Khuangchera	- 71
Total	- 214

Pem

Heng mite hi kan veng chung a tanging an pem:

- 1) Pu Lalruatdika te chung member pa 4, Pu Dawngliana in K-Sect. a tanging Laipuitlangah.
- 2) Pi Lalthakimi te chung member pa 4, Dr Hmingthanzuala in K-Sect. a tanging Tuirial Airfield -ah.



TUNKARCHANGVAWN

Tin, in hmangaihtute chauh in hmangaih hian lawm eng nge in hlawh ang? Misualte pawhin an hmangaihtute chu an hmangaih thin asin. *Luka 6:32*

Editorial Board

Editor:	R. Lalrinnggheta	9862358337
Joint Editor :	Lalchhandama	9862358347
	J.Lalnangliana	9862399658
News Editor :	Thangkhuma	9862303135
	Lalchhuanmawia	9862580558
	K. Lalremtluanga	9862119608
Cir.Manager :	Jacob Lalrinsanga	9612319779
Production Manager :	T. Ngurkhuma	9436190843

Branch Office Bearer

President	<i>C. Lalzarliana</i>	9436142049
Vice President	<i>T. Ngurkhuma</i>	9436190843
Secretary	<i>Zairemmawia</i>	9862385654
Asst. Secretary	<i>RL. Thanhnuna</i>	9436152760
Treasurer	<i>R. Lalmachhuana</i>	9436151817
Fin.Secretary	<i>K. Darthantluanga</i>	9436196071
Adviser-te :	<i>Pu F. Zosanga</i>	9436142106
	<i>Pu A. Biaklawma</i>	9436363169
	<i>Pu Lalrengpuia Sailo</i>	9862075614

Editorial :

Tun hnaiah veng chhungah chhiat kan tawk zing hle mai, YMA member, nu leh pate kan awl lo khawp mai. A bik takin YMA hruaitute an rim leh zual awm e. Kan inṭawiamna pawh a ṭha viau.

Chutih rual chuan mit kan tlun lohna lai leh kan induhkhawp lohnate kan sawi loh chuan kan ṭha famkim ta mai emaw tih a awl, sawisel tur in zawng leh hram teh ang.

Chanchinbu pakhat chuan ti hian ziak a, "YMA hruaitu ṭhenkhat, Khawhar in kal, Thlanlah leh Lumen aia committee-ngai pawimawh a, kal ṭha zawk an awm" tiin. Hruaitu kan nih chuan committee chu kan tihmakmawh a ni. Chumi piah lamah he pawla hruaitu kan nih chhan hi kan hriatchian a ṭul hle awm e.

Tumah hi kan tlin leh phu reng vanga he chanvo chelh hi kan awm lo vang. Mahse member-te leh kan hruaitute'n keimahniah beiseina sang tak nei chungin he mawhpurhna rit tak hi min bel a ni tih i hre thar leh ang u. Hruaitu ni lo te'n a an tih peih loh hi hruaitu kan nih vang taka kan tih tur a ni fo. Kan veng chhungah hian YMA hruaitu ni si, tlawmngaihna hmun tura lang ngai vak lo kan tam sawt khawp mai, in enfiah leh deuh chu kan ngai a ni.

Hruaitu chu member-te hmaa kal tur kan ni tih hriain, member-te tana entawntlaka kan khawsak a pawimawh awm e. Thil dangah kan fel famkim kher lo vang, mahse kan telna pawlina a tum leh hmalaknaah chuan theihtawp chhuah ila, hruaitu ṭha kan ni mai ang. Engpawhnise, kan thlen chin aṭang hian hma i sawn zel ang u.

Article: **Ram leh hnam humhalh loh dan**

Pa ber emaw, nu ber emaw, chhungkaw ei bel mi dang tu emawin sum thianghlim lo hmanga chhungkua a relbawl chuan amah emaw, a fate emaw, a chhungte emaw chu sualah a hralh tihna a ni a, sual chu ram leh khawtlangin a huat ber a ni a, ram leh hnam humhalh lohna bulṭhut a ni bawk.

Eiruk hian ram leh hnam a humhalh lo mai ni lovin, chi ṭha lo tam tak a hring chhuak ṭeuh ṭhin. Khawvela ram awhawm lo leh buai nasa, tharum hmanga inbeihna leh ruihhlo hluarna, ram ralmuang lo kan tihte hi eiruk nasatna ram a ni deuh zel a, eiruk hian rah ṭha pakhat mah a chhuah lo.

Bible-ah chuan "sum ngainat hi sual tinreng bul a ni" tih kan hmu a, hetiang taka sualna bulpui thil dang hriat tur a tam lo. Sum avanga patling emaw nutling emaw a at tawh chuan ram leh hnam a humhalh lo tih sawi lan kher a ngai hran lo. A sahmim tihpuarna chiah ngaihtuahin nawmsak leh ropuina thlira sum chu Pathian anga a biak tawh chuan amah leh a chhungkua ngei pawh sualah thuk takin a hnuk lut ṭhin.

Mihring inthlah chhawng leh chhuan inchherchhuan chhoh dan hi thlir ila, mi hlemhle reng reng hmuingil an awm ngai lo. Thlemna do zo lova eiru ṭhinte hian hmai pih tumin kohhran leh khawtlang bakah, ṭanpui ngaite tan an sum theh chhuak ṭhin mah se, sual tipunluntu mai an ni a, an chungah meiling an chhek tam ting a, mi dang a kangkai zel bawk nen hlauhawm tak a ni ringawt.

Kristiante Pathian phei chu mihringte sualna avanga phuba lak hmaih ngai lo a ni a, ka eiruk rualin kei mah mai ni lovin setana hnenah ka fapa emaw ka fanu emaw ka eng emaw ber ka pe a ni deuh ber a, chu chu pawisa lova kan eiru zel a nih chuan tuar tura kan inpeih a ṭul tihna a ni.

Sorkar leh khawtlang phal loh hmanga sum hui ṭeuh ṭeuh a, ruihhlo

- *Thangkhuma*
hmanga sumdawnge te hian an thlarau chung a roreltu an chhah kawlh tih pawh hriat a ṭha hle. Tuin emaw a dam chhung atan nawmsak a duh avanga dik lo taka sum a lak loh hian nghawng a nei thui thei em em a, chhuan tam taka a thlahte thlengin sualna kawngah a hruai lawk daih tawh.

Thlahtu bul chhuitu pakhat chuan a hun laia zahawm taka nun hmang a, Pathian tana rinawm taka rawngbawl tlat ṭhin leh a hun lai veka zu zuara intihausa, suma rinawm lo khaikhinin an thlahte a chhui zui a, kum 100 chuang chhunga an thlah kal zelte a bihchiang.

A hun laia sum leh paia ropuina nei lo, a nun rinawmna avanga mite zah em em ṭhalbe aṭang chuan ram tana mi chenfakawm leh ṭangkai tak tak leh rawngbawltu eng emaw zat an chhuak. Zu zuar ṭhin thlah kal zelte chu suahsualna avanga thi, ruihhlo buai, ram leh khawtlang tibuitu, khawtlangin a mamawh miah loh mihring eng emaw zat bakah, tualthi ta mai an awm nawk niin an tarlang.

Kan khawtlangah hian rinawm lo, suma lei theih, mahni zahawmna pawh zah zo lova sum awmna pan ruak ruak, eiru leh dik lo taka sum la lut kan pun zel chuan ram leh hnam humhalh tumin infuih vak vak mah ila, mi lawilo kan pung tual tual dawn.

Europe-a Scandinavian ram tia an sawi thin Norway, Denmark velah khuan eirukna a awm ve ngai lo tluka ngaih a ni a, khawvel ram zinga eiruk tlemna ber an ni ngar ngar ṭhin. Ram leh hnam humhalh an mamawh lo ni lovin humhalh tura inkar chiam chiam an mamawh hran lo niin a hriat.

Scandinavian ramte hi sualna lakah an fihlim vek lo na a, dan bawhchhiatna lian tham leh sual tawrawt tak tak bakah, indo thu thang emaw inthahna chanchin rapthlak an nei ve ngai mang lo. Sum lak loh kawnga rinawmna chu mihringin a tih turah an ngai a, nun dan

phok 4-naah zawm a ni

Chawngbawla Section

□ Dt.6/4/13 (Inrinni) nileng khan New Horizon School thawmthat-a sumtuak hnatlang neih a ni a, tlaiah chawhlui kilho nghal a ni. Sum leh paia tanpuitu- Pu Madinga (₹1000) leh Pu C Lalnthanga (₹100) te chungah lawmthu an sawi. Member an thawk chhuak tha hle.

□ Ni 10.4.2013 zan khawhar in ban khan sum tuak nan PHE pipe phumna tur kawng an lai a, inhlawhna siamsaktu Pu Lalrammawia (Tetea), ei leh in tumsaktu-Pu C Lalnthanga leh Pu Lalchandama Ralte te chungah leh hnatlang chhuak zawng zawng chungah lawmthu an sawi.

□ An member Tv HVLalremruata (Angcha-a) damdawiin awm pawh dam takin a lo chhuak leh ta.

□ Pi Ruati w/o Pu Sangkhuma chu Synod Hospital-ah zai a ni a, dam taka a lo chhuah leh thuai an duhsak.

□ Section hruaitu hlui Pro.Pastor Lalhmunmawia Pachuau chuan ni 11.4.2013 khan kawppui thar duhawm tak a nei a, an lawmpui hle.

□ Dt.13/4/13 (Inrinni) zingkar khan YMA Chhang te nen faina hnatlang neih a ni.

□ Tunkar hun remchangah section committee thut tum a ni.

Khuangchera Section

□ Hun remchang hmasa berah Meeting neih an tum a, hruaitute hunawl lo insiam turin an hriattir.

□ YMA Chhang member lak zawh tawh a ni a, Section chungah YMA Chhang member mipa 84 leh hmeichhia 70 an awm.

□ Tv Vanlaldika leh Pu K Lalremmawia te chu Section Committee member atan an ruat thar.

□ April - June thla chung OB Incharge atan Pu T. Ngurkhuma, Vice President, Branch-in a rawn ruat chu lawmawm an ti hle.

□ Khawtlang faina ngaipawimawha Local Council-in runthlak hnatlang a koh chu tha an tiin lawmawm an ti hle.

Neuva Section

□ Ni 9.4.2013 (Thawhle) zan khan Pasaltha Neuva Inah Section Committee meeting an nei.

□ Kumin chung hian YMA chhang member 176 an awm.

□ Hun remchang hmasa berah Section huam chhunga Two Wheeler leh Four Wheeler te silfai a sumtuak hnatlang neih an tum.

Taitesena Section

□ Ni 9.4.2013 (Thawhle) zan khan Section Committee an nei a, thu pawimawh tak tak an rel.

□ Ni 14.3.2013 (Pathianni) thlai dar 3 hian Section huamchungah bial 1-na member te tlawhchhuah tum a ni a, member-te ina lo awm theuh tura an inngen mai bakah hruaitute kim taka kal turin an inhriattir bawka ni.

□ Ni 12.4.2013 (Zirtawp) zan khan Kuang duan a ni a, workshop hman tirtu Pu H Lalngaihawma chungah lawmthu an sawi.

□ An section Secretary Tv Lalbiaksanga chu Khawbung lamah ruang zuiin a thang mek a, tin, an hruaitu Tv. Lalthuagliana pawh zirna thilah Delhi leh Darjeeling lamah a thang mek bawka, dam taka an lo haw leh thuai an duhsak hle.

□ An Section dinhmun :-

YMA Member	-	618
YMA Chhang member	-	182
YMA AW la zat	-	265
YMA chanchinbu la zat	-	46

□ CWBYMA Silver Jubilee lawmna tur atana Jubilee Budget ₹ 10000/- chu ni 12.4.2013 (Zirtawp) khan an tlak fel.

□ Thla a lo thar leh ta, chhungtinte Chhiatni Fund leh YMA Aw man la tifel loten ngaipawimawh turin an inhriattir nawn leh a ni.

Vanapa Section

□ Ni 11.4.2013 (Ninga) zan khan committee an nei a, Vanapa Run luah turin Pu Vanlalzawmliana te chung an thlang.

□ Asst. Secy Pu R Vanlalsawma leh committee member Pu Zonunmawia te an piin a boralsan a, an tawrhpu hle.

□ An hruaitu Tv Zohmingliana, a pa boral vanga zin pawh dam takin a lo haw leh ta.

□ Bial 7-na Mitthi Buhfai khawn turin Lalthapuii d/o Biaksanga leh F Lalrinzuali d/o F Lalramzauva te ruat thar an ni.

□ B Lalramhluna chu Lunglei Zohnuai atangin an section chungah a rawn awm thar a, mi tangkai tak a nih ngei an beisei.

Kan Then Tak

Pi Lunglengtheithini (Kum 73), Pa hming-Rochhunga (L), Nu hming-Darpuithangi (L). Pianpui unau mipa 3 leh hmeichhia 8 a nei. Fapa 2, fanu 1 leh tu 15 a nei. Sialhawk khuaa khawsa thin an ni



a, kum 2001 atangin Aizawl-ah an khawsa. Pi Theithini hi mi rilru nghet tak mai, huaisen taka thu dik nia a hriat chu kal tlangpui ngam mi, Pathian thih mi leh tawngtai ngaina tak a ni. Lehkha a thiam sang lo chungin lehkha chhiar a taima a, a hriatna pawh a zau hle. Holy Bible hi wawi 4 ngawt a chhiar chhuak a, a lawina kohhran Salvation Army-chuan Holy Bible chhiarchhuak lawmman atan tum 2 ngawt Bible an hlan tawh. Kal leh chaup tha lo vangin NApril ni 4 khan Civil Hospital-ah dah luh a ni. Ni 6.4.2013 (Inrinni) thlai dar 3:00-ah a boral.

Pi Khawvelthangi (Kum 78), Pa h m i n g - Sathranga (L), Nu hming-Chalrua li Pianpui unau mipa 5 leh hmeichhia 5 a nei. Kum 1952-ah



KLianvela nen an innei a, fapa 6 leh fanu 6 an nei. Pi Khawvelthangi hi mi zakzum, nungchang tha tak, mi pawisawi hlau leh inthlahrung thei tak mai leh nu taima tak a ni. Pasal fanaute ngaihsak tak mai, chhungkaw huikhawm thiam leh thenrual pawl thiam tak a ni. Tunhma deuh atangin abawrhawm hle a, Lungna leh pumna avangin a pawn chhuak meuh lo. Kum 2012 atangin Pneumonia a nei tih hmuhchhuah a ni a, Aizawl Civil Hospital-ah kar khat vel a awm a. Ni 9.4.2013 (Thawhle) chhun dar 12:30-ah a boral.

Ruang chhuak

Pi Lalzawni kum 66 Bukpui khua chu ni 7.4.2013 (Pathianni) zing dar 4:30 khan Aizawl Civil Hospital-ah a boral, a ruang hi Pu PC Pakunga in T-Sect-ah chawlhpu a ni a, kuang siamsaka nih hnuin an khua panpuiani.

Kumpulan Sub-Committee

Vawiin (14.4.2013) tlai dar 3:30 hian Kumpulan Sub-Committee Meeting pawimawh tak mai Pu Lalchhanhima (Puia), K-sect inah neih tur a ni a, member-te ngai pawimawh theuh turin an in ngen

Thlanmual Sub-Committee

□ An hruaitu Pu K Lalrinmuana chu a nu damloh avangin a zin mek a, dam taka a rawn hawsan leh theih thuai an duhsak.

□ Veng chhung tlangvalte leh pavalaithe thlan laiha tan la thar leh turin an sawm.

MHIP

Ni 11.4.2013 (Ninga) zan khan Pu F Zosanga, Chairman, Local Council kaihhruiin, MHIP Building-ah kum 2013 chhung atana hruaitu tur an thlang a, chung mite chu:

President - Pi Lianzami Khiangte
V. President - Pi PC Chuaudingliani
Secretary - Pi Lalthanmawii
Asst.Secy - Pi Vanlalmawii
Treasurer - Pi F Lalramsiami
Fin.Secy - Pi Hriattiri

ZOFA

□ An President Pu Patea chu a damsam lova, a that leh thuai an duhsak hle.

□ Tunlai hian Indoor Stadium-ah Mizo Hnam Lam zir thin a ni a, tunah hian thalai mi 50 velin Mizo Hnam Lam chi 3 an zir chhuak tawh a, veng chhung mi, a duh apiangte tan a la zir theih reng a ni.

□ Lam zirtirtu tura ruatte mahni hun ngai pawimawh turin an inchah nawn leh a, Lam zir dan leh zir hun tur hrechiang duh chuan Asst Secretary Tv Mangheta hnenah zawh fiah theih a ni e. Hruaitute mahni remchan dan ang zela Lam zir hi tawiwam thin turin an insawm

□ Lam zir tura fate rawn kaltir thintu nu leh pate chungah lawmthu an sawi.

Ration Card tibo

Ni 11.4.2013 (Ninga) zingkar khan Chanmari West Kawipui leh Company Peng inkarah ka Ration Card ka ti bo hlauh mai a, a lo hmu leh chhar chuan khawngaiha min pe leh turin ka ngen a che u.

In khawngaihna diltu

Lalramliana, CW Thlanmual Peng
Ph no-9612977869

article chhunzawmna....

phung pangngai a nih avangin thil harsaah an ruat lo va, rinawm lohna avanga hausakna chu nuihzatbur nihna a ni.

Eiruk hi piangsualte tih tur ang thaw thangin an ngai a, thil kalphung pangngai zui mai chu hnathawh dan awlsam ber leh mihring hlutna a nihzia an man hle a ni ngei ang.

Ruihhlo do rem vekin hnam dang nupui pasal innei awm miah lo pawh ni ila, ram leh hnam tana hlauhawm ber eirukna a pung zel a nih chuan ram din chhuahna a hla telh telh tihna a ni tho. Chutiang mi chu Mizo zingah hian an pung chak hle niin an sawi a, kohhran leh rawngbawlnaah pawh timna nei chuang lovin an lut hnem tial tial.

Retheihna hi rinawm lohna bulpui pakhat a ni a, sorkar kalphung fuh lovin mipui rilru a tihchhiat theihzia leh a chawikan nasat thinzia ngaihtuahin, sorkar hruaitute'n ram leh hnam humhalh loh kawngah mawngphurhna an nei nasa em em.

Intlan dawna ₹ 500, ₹ 1000-a lei theihthe hi mi khawngaihthlak an ni a, an rinawm lohnaah dem ngawt theih an nih loh chin tam tak a awm. Thingtlang mite leh khawpuia awmte tan pawh hnathawhin awmzia a neih theihna tur khawp sorkar kan mamawh a ni.

Sorkar tha hnuaiah chawp-lehchilhin mi nawlpui an tha mai a, an rinawm mai. Khawvel chanchin en hian sorkar tha nei turin ram tam takah siamthatna a thleng thin a, thisen tam tak hmangin sorkar tha zawk an lei thin. Rethei an punna hmun apiangah rinawm lo an tam a, mi hlauhawm an thahnem tial tial bawk.

Miten eirukna leh dik lo taka sum tam tak an lak luh reng lai a, dik taka hnathawh duhin a inchawm zawhna khawp hnathawh tur a neih tawh loh chinah chuan a rilruah sorkar laka helna a intuh nghal a, he chi chhe tak hi a than len zel chuan ram leh hnam humhalh lohna a thleng thin.

Hnathawhin awmzia a neihna ramah tawngkaa rinawm tura infuih chiam chiam a tul lo fo va, hnathawh hlauh late hian an dukhawp sum an nei a nih chuan eiru leh dik lo taka insiam liante an awt lem lo va, an hmuhsit loh vek pawhin mi pangngai anga en kher an ba hran lo.

BADMINTON

□ An member J. Lalremruata'n nupui a nei chu an lawmpui hle.

□ Ni 4.5.2013 (Inrinni) hian One Day Tournament khelh pahin hruaitu an thlang dawn.

□ Member-te Hall Fee ngai pawimawh turin an an inngen.

KEIMAHNI

□ Branch Secretary Tv Zaita'n a tawp thlengin min tawiwam a, kan lawm hle.

□ News Editor, Pu J Nanga chu kan zingah kar 2 a tel ve thei ta lo, kan ngai thin khawp mai. Kar lehah chuan a rawn tel ve ngei tawh kan beisei.

□ Pu Lalbiakkima Sailo (Akimte'a) chuan YMA AW buaipuitu te tan Chini min rawn pe a, kan lawm hle mai

IN LUAH TUR DUH

In ruak \$ 1500 - \$ 3000 man vel luah tur kan mamawh a, a nei chuan min lo be teh u.

Vanromawia

T-Section, _ 9862957982 (2-1)



Ran chaw chi hrang hrang Company tha, Vawk leh Ar chaw, a te a'anga a lian, a tuilai thlengin kan nei e. A mamawh tan dawr theih kan ni e.

ROZO FEEDS

Kawngkawipui, Pu Lalbiakthanga Building

+ 2341708, _ 9774954992

(2-1)

MAMA SHOE STORE

Pheikhaw chi hrang hrang, Sneaker leh Smart Shoe duhthlan tur a rawn thleng thar leh ta.

School Uniform pheikhaw-Original Intac leh Liberty Authorise Dealer kan ni bawk.

Red Tape, Woodland, Banish, Hitz pawh kan nei a, min rawn dawr ve thin dawn nia.

Contact- Vanromawia (Mawitea)

T-Sect Ph.no- 9862957982

Millenium Centre

D-73 (3rd Floor) (2-1)